



REPUBLIKA E SHQIPËRISË
AUTORITETI I KONKURENCËS
KOMISIONI I KONKURENCËS

VENDIM

Nr. 549, Datë 27.09.2018

“Mbi autorizimin e përqendrimit të realizuar nëpërmjet krijimit të ndërmarrjes së përbashkët “AIR ALBANIA” SHPK”

Komisioni i Konkurrencës me pjesëmarrjen e:

Znj. Juliana LATIFI	Kryetar
Z. Eduard YPI	Zv/Kryetar
Znj. Leida MATJA	Anëtar
Znj. Adriana BERBERI	Anëtar
Z. Helidon BUSHATI	Anëtar

Në mbledhjen e tij të datës 27.09.2018, shqyrtoi çështjen me:

Objekti: Autorizimi i përqendrimit të realizuar nëpërmjet krijimit të ndërmarrjes së përbashkët “AIR ALBANIA” SHPK

Baza Ligjore: Nenet 2, 10-12, neni 24, germa d, dhe nenet 53-64 të Ligjit Nr. 9121, datë 28.07.2003 “Për Mbrojtjen e Konkurrencës”, i ndryshuar. Rregullorja “Për zbatimin e procedurave të përqendrimit të ndërmarrjeve”, Udhëzimi “Për formën e njoftimit të përqendrimit” dhe formulari i njoftimit të përqendrimit”.

Komisioni i Konkurrencës, pas shqyrtimit të relacionit të Sekretarit të Përgjithshëm si dhe raportit të Drejtorisë së Analizës dhe Metodologjisë, mbi njoftimin e përqendrimit mbi krijimin e ndërmarrjes të re të përbashkët “AIR ALBANIA” SHPK;

VËREN SE :

1. Procedura dhe Transaksioni

Autoriteti i Konkurrencës është njoftuar nga Albcontrol SHA, lidhur me zbatimin e Vendimit të Këshillit të Ministrave Nr.309, datë 16.05.2018 “Për përcaktimin e procedurave të krijimit të shoqërisë “AIR ALBANIA SHPK”, nga tre ortakët “Albcontrol” SHA, “Turk Hava Yollari A.O” dhe “MDN Investment” SHPK.

Ortaku 1: ALBCONTROL SHA, një shoqëri aksionare, 100% shtetërore me objekt të aktivitetit ofrimin e shërbimeve të navigimit (lundrimit) ajror, të nevojshëm për të

garantuar sigurinë, efencën dhe rregullshmërinë e operimit të avionëve në hapësirën ajrore dhe në aerodromet civile të Shqipërisë dhe më gjerë, të publikuara në AIP Albania, në përputhje me standardet ndërkombëtare, marrëveshjet dhe rregulloret në fushën e lundrimit ajror të ratifikuara.

Ortaku 2: MDN INVESTIMENT SHPK, është një shoqëri shqiptare me përgjegjësi të kufizuar me objekt të aktivitetit projektimin, financimin, ndërtimin, kryerjen, funksionimi si dhe menaxhimi i Aeroportit Ndërkombëtar, i cili përfshin ndër të tjera marrjen në pronësi nga shoqëria të terminalit të Ri, Zyrave të reja të Administrimit, Qendrës së re të Ngarkesës Ajrore, Pajisjeve të reja të karburantit, rrugës së re të hyrjes së Urës së Re dhe zotërimi dhe ushtrimi i uzufruktit nga shoqëria në lidhje me zonën e koncesionit. Ofrimin e shërbimeve të transportit të udhëtareve brenda dhe jashtë vendit etj.

Ortaku 3: TURK HAVA YOLLARI A.O, një kompani që ekziston sipas ligjeve të Turqisë. Veprimtaria ekonomike e Turkish Airlines është transporti ajror i udhëtarëve, postës, kafshëve, sendeve dhe çdo lloj transporti të lidhur me to dhe për rrjedhojë: të shesë bileta në lidhje me transportin ajror, të ortakërisë dhe me të tjerë dhe të bëjë depozitime; të prodhojë dhe riparojë çdo gjë në lidhje me avionët dhe pjesë të avionëve, të sigurojë ruajtjen/mirëmbajtjen e tyre dhe në këtë drejtim të ketë depo dhe qendra rregullimi/riparimi; të administrojë mjete transporti; të themelojë, të ndërtojë dhe të vërë në punë qendra telegrafike, telefonike, energjetikë, lidhje komunikimi pa tela dhe çdo gjë lidhur me vijimin e punës me to, etj.

Shoqëria Target: AIR ALBANIA SHPK, me NUIS L82113028I, regjistruar më 13.09.2018 me tre aksionar/ortakë kryesore, Albkontrol SHA që zotëron 10% të aksioneve; MDN Investiment SHPK që zotëron 41% të aksioneve dhe Turk Hava Yollari A.O që zotëron 49% të aksioneve. Objekti i aktivitetit të shoqërisë së re është kryerja e të gjitha llojeve të transportit ajror të brendshëm dhe ndërkombëtar duke përfshirë të gjitha llojet e transportit ajror për pasagjerët, postën, kafshët dhe ngarkesën për në dhe nga çdo pikë brenda dhe jashtë Shqipërisë, si dhe për të gjitha punët dhe angazhimet e tjera të rastit lidhur me to, duke përfshirë por jo kufizuar në shërbimin e furnizimit me ushqim, shërbimet në tokë dhe shërbimet në sallat e pritjeve si dhe operacione tregtare të avionëve/riparimin dhe mirëmbajtjen e avionëve.

Transaksioni plotëson kriteret e përcaktuara në nenet 10 dhe 12 të Ligjit Nr. 9121, datë 28.07.2003 “Për Mbrojtjen e Konkurrencës”, i ndryshuar duke përberë objekt shqyrtimi dhe vlerësimi nga Autoriteti i Konkurrencës.

2. Vlerësimi i përqendrimit

Referuar nenit 3, pika 7, të Ligjit Nr. 9121, datë 28.07.2003 “Për Mbrojtjen e Konkurrencës”, i ndryshuar, si edhe Udhëzimit Nr.76, datë 07.04.2008 “Për përcaktimin e tregut përkatës”, përcaktimi “treg përkatës” përfshin dy komponentë:

- I). tregu përkatës i produktit, dhe
- II). tregu përkatës gjeografik.

Tregu përkatës i produktit: treg përkatës të produktit do të konsiderohen tregu i transportit ajror të udhëtareve dhe kargos në linjat direkte.

Tregu përkatës gjeografik: Zona gjeografike e shërbimit të transportit ajror do të

konsiderohet territori i Republikës së Shqipërisë.

Shoqëria e re Air Albania SHPK do të fillojë fluturimet në linjën Tiranë-Stamboll dhe anashjelltas dhe më vonë do shtrihet në Romë, Bolonjë, Londër dhe në linjat ndërkontinentale duke plotësuar kërkesën konsumatore për zgjedhje të reja dhe duke rritur shkallën e zëvendësueshmërisë së shërbimit nga ana e ofertës.

Me fillimin e aktivitetit të kësaj shoqërie, Shteti shqiptar do të paraqitet me linjën e vet kombëtare, duke ofruar shërbim në linja të cilat me parë ofroheshin vetëm nga operatorë të huaj. Shoqëria e re pritet të sjellë efekte pozitive mbi konkurrencën në tregun e transportit ajror nëpërmjet çmimeve konkurruese dhe cilësisë së shërbimit.

Për sa më sipëri ky përqendrim nuk shfaq shenja të kufizimit të konkurrencës në treg ose në një pjesë të tij në veçanti, si rezultat i krijimit ose forcimit të pozitës dominuese dhe për këto arsye propozojmë t'i kërkon Komisionit autorizimin e këtij përqendrimi në përputhje me nenin 56, pika 1 të Ligjit Nr. 9121, datë 28.7.2003 "Për Mbrojtjen e Konkurrencës", i ndryshuar.

Si konkluzion ky përqendrim nuk shfaq shenja të kufizimit të konkurrencës në treg ose në një pjesë të tij në veçanti, si rezultat i krijimit ose forcimit të pozitës dominuese.

PËR KËTO ARSYE:

Komisioni i Konkurrencës, në bazë të nenit 24, shkronja d dhe nenit 56 pika 1 të Ligjit Nr. 9121, datë 28.07.2003 "Për Mbrojtjen e Konkurrencës", i ndryshuar,

VENDOSI:

1. Të autorizojë përqendrimin e realizuar nëpërmjet krijimit të ndërmarrjes së përbashkët AIR ALBANIA SHPK.
2. Ngarkohet Sekretari i Përgjithshëm për njoftimin e palëve dhe dërgimin e vendimit pasi të bëhen pagesat që parashikon rregullorja "Për caktimin e shpenzimeve për ndjekjen e procedurave pranë Autoritetit të Konkurrencës".

Ky vendim hyn në fuqi menjëherë.

KOMISIONI I KONKURRENCËS